

# Biskoppimik qinersineq pillugu Namminersornerullutik Oqartussat nalunaarutaat

Ilageeqarneq pillugu Inatsisartut peqqussutaanni nr. 15-imi, 28. oktober 1993-imeersumi § 5, imm. 2 naapertorlugu aalajangersarneqarput:

## Kapitali 1.

*Qinersinissamut piareersarneq.*

**§ 1.** Ilageeqarnermut Naalakkersuisup Kalaallit Nunaata Biskoppeqarfiani biskoppissamik ulloq suna qinersisoqarnissaa aalajangissavaa nalunaarutigalugulu, aamma qinigassanngortinniarluni nalunaaruteqarnissamut killiliussaq ilanngullugu. Ilageeqarnermut Naalakkersuisup aammattaaq aalajangissavaa nalunaarutigalugulu ullormi qinersivimmi piffissami sumi qinersisoqassanersoq, tak. § 12.

**§ 2.** Qinersinermut ataatsimiititaliamik qinersinermi siulersuisussamik pilersitsisoqassaaq.

*Imm. 2.* Qinersinermut ataatsimiititaliaq inuttalersorneqassaaq Namminersornerullutik Oqartussani qullersaalluni pisortamik, Kalaallit Nunaanni Kommuneqarfitt Kattuffianni pisortamik kiisalu Inatsisartut Allattoqarfianni pisortamik taakkualuunniit sinniisussaannik.

*Imm. 3.* Namminersornerullutik Oqartussani qullersaalluni pisortaq qinersinermut ataatsimiititaliamut siulittaasuussaaq.

*Imm. 4.* Qinersinermut ataatsimiititaliaq sulinini pillugu allattaaveqassaaq.

*Imm. 5.* Ilageeqarneq pillugu Pisortaqarfik qinersinermut ataatsimiititaliamut allattoqarfiussaaq.

**§ 3.** Ilagiit sinniisoqarfíni tamani qinersinissaq piareersarneqarlunilu siulersorneqassaaq ilagiit sinniisuinut siulittaasumit imalunniit ilagiit sinniisaanni ilaasortamit taamaasiornissamut piginnaatitaaffilerneqarsimasumit.

**§ 4.** Qinersinermi ataatsimiititaliap qinersinermi taasisinnaasutut isigineqartut allattorsimaffiat suliarissavaa, tak. § 10.

*Imm. 2.* Qinersisinnaasut allattorsimaffiat palaseqarfinnit paasissutissat tunngavigalugit suliarineqassapput imarissallugillu ateq, ulloq ukiorlu inuuik qinersisinnaatitaasullu najugaa pillugit paasissutissat.

*Imm. 3.* Ulloq qinersiviusussaq tikitsinnagu inuup qinersisinnaatitaanermini piumasaqaatit naammassisinnaajunnaarpagit, qinersisinnaasut allattorsimaffianit peerneqassaaq.

*Imm. 4.* Nalornisoortoqartillugu qinersinermut ataatsimiititaliap inuk qinersisinnaasut allattorsimaffianut ilanngunneqassanersoq tassanngaluunniit peerneqassanersoq aalajangiiffigisassavaa. Qinersinermut ataatsimiititaliap aalajangiinera inaarautaasumik aalajangiineruvoq.

**§ 5.** Biskoppissatut taamaallaat toqqarneqarsinnaavoq inuk ilagiinni kalaallini palasitut atorfekartoq imaluunniit atorfekareersimasoq aammalu

- 1) upperisarsiornermut tunngasunik palasitut atorfinissutissamik Danmarkimi universitetimi soraarummeernermik naammassinnissimasoq imaluunniit
- 2) Danmarkimi ilagiinni palasiusimasoq imalunniit palasinngornissamut piumasaqaatinik naammassinnissimasoq imaluunniit
- 3) ilinniagaqarsimasoq nalinginnaasumik ilisimasassanut tunngasutigut Danmarkimi ilinniartitsisutut, ilanngullugu Nuummi Ilinniarfissuarmi ilinniartitsisutut, ilinniagaqarsimanermut sanilliunneqarsinnaasunik tamatumalu saniatigut kristumiussutsimut tunngasunik annertunerusumik ilinniagaqarsimasoq imaluunniit

4) Kalaallit Nunaanni Namminersornerullutik Oqartussat peqqussutigisaasa ilaannik upperisarsiornermut tunngasutigut palasissatut ilinniarsimasoq ilagiinni kalaallini atorfininnissaq siunertaralugu.

**§ 6.** Qinigassanngortinniarluni nalunaarut qinersinermut ataatsimiititalameeriissaq qinigassanngortinniarluni nalunaarfissarititaasup qaangiutinnginnerani.

**§ 7.** Qinigassanngortinniarluni nalunaarut qinersisartut ilaannit ikinnerpaamik 20-nit amerlanerpaamillu 30-nit qinigassanngortitsisunik atsiorneqarsimassaqq § 10 naapertorlugu. Atsiuinerit nalunaarummi namminermi taassumaluunniit nuutinnerani allanneqarsimassapput.

*Imm. 2.* Qinigassanngortittup atsiornermigut qinigassanngortinneqarnini upternarsassavaa.

*Imm. 3.* Qinersisinhaasooq ataaseq qinigassanngortittunut arlalinnut qinigassanngortitsisuusinnaanngilaq.

*Imm. 4.* Qinigassanngortitsivimmi allassimassapput qinigassanngortitsisut ataasiakkaarlutik aqqi, ulloq ukiorlu inuuiat aamma najugaat.

**§ 8.** Qinersinermut ataatsimiititaliap qinigassangortinniarluni immersukkat tunniunneqarnissaannut killiliussap qaangiunnerani piaarnerpaamik aalajangersassavaa, qinigassanngortinniarlutik nalunaarutit takkussimasut atorsinnaasutut isigineqassanersut. Qinigassangortitsinermi kukkuusoqarsimappat, qinersinermut ataatsimiititaliaq ullunik marlunnik piffisaliisinnaavoq kukkunerup iluarsineqarnissaanut.

*Imm. 2.* Qinigassanngortittutut akuersissutigineqartut aqqi tamatuma kingorna ilagiit sinniisoqarfiani tamani siulittaasumut erniinnaq nalunaarutigineqassapput.

## Kapitali 2.

### Taasineq

**§ 9.** Ilagiit sinniisuini siulittaasup taasiviit aamma qinersisinhaasut allattorsimaffi tigugunigit misissussavai, taasiviit allakkap poortallit amerlassusissaat naammattut kiisalu qinersisinhaasut allattorsimaffiat ilagiit sinniisoqarfiani qinersisinhaasunik tamanik imalik tiguneqarsimanersut.

**§ 10.** Qinersinermi taasisinhaapput Kalaallit Nunaata biskoppeqarfiani ilagiit sinniisuini ilaasortat tamarmik, palasit allani suliffeqartut palasillu taasinerup nalaani sulinngiffeqartut.

**§ 11.** Taasineq ilagiit sinniisuisa ataatsimiinneranni pissaaq.

*Imm. 2.* Biskoppissarsiornermut taasisinhaasut kisimik ataatsimiinnermi peqataasinnaapput.

**§ 12.** Ilagiit sinniisuini siulittaasup ataatsimiinnissamut piffissaq aalajangissavaa ilagiillu sinniisui ataatsimiigiaqqussallugit.

**§ 13.** Ataatsimiinnermi ilagiit sinniisuini siulittaasup nalunaarut nassiunneqarsimasoq atorlugu qinigassanngortissimasut aqqi ilisimatitsissutigissavai.

*Imm. 2.* Ilagiit sinniisuinut siulittaasoq taasivimmit tassungalu atasumik allakkat puuanik tunniussinermi qinersisinhaasut allattorsimaffiannut qinersisinhaatasaup pineqartup nalaatigut krydsiliisassaaq.

*Imm. 3.* Taasinissami atorneqassaaq taasivissaq immikkut ittoq kalaallisut qallunaatullu ima allannilik:

"biskoppimik qinersineq".

*Imm. 4.* Qinersisup pappiara taasivigissavaa qinigassangortittup qinerusutami aqqa allallugu. Tamatuma kingorna taasivik allakkat puuannut tassunga atasumut ikissavaa, ilagiillu sinnisaasa siuliuttaasuannut tunniutissallugu.

*Imm. 5.* Taasineq naammassiniariarpal qinersinermi siulersuisup allakkat puui imm. 4-im i taaneqartut aamma qinersinermi atortussat atorneqarsimanngitsut ataatsimut puussaannut ikissavai. Allakkat puuat taanna kiisalu qinersisinnaasut allattorsimaffiat qinersinermut ataatsimiititaliamut kingusinnerpaamik ullup tulliani nassiunneqassapput.

**§ 14.** Qinersisinnaasoq taasisimasoq kina taasimanerlugu oqaatigissallugu pisussaanngilaq.

### Kapitali 3.

*Qinersinerup nalunaarsuuisorneqarnera.*

**§ 15.** Pappiara taasivik atortussaassanngilaq:

- 1) qinigassangortittup ataatsip aqqata saniatigut allamik allaffigineqarsimaguni,
- 2) erseqqisumik aalajangerneqarsinnaanngippat qinigassangortittoq sorleq qinersisup taaniaraluarsimaneraa,
- 3) allakkap puua matoqqasoq taasivissamik ataasiinnaanngitsumik imaqassagaluarpat, imaluunniit
- 4) isumaqarnassagaluarpat pappiara taasiviusimasoq peqqussutit malillugit suliarineqarsimanngitsoq.

**§ 16.** Qinersinermut ataatsimiititaliap nalunaarsuuissavaa inerneralu naalakkersuisunut nalunaarutigissallugu kiisalu tamanut tusagassanngorlugu nalunaarutigissallugu.

### Kapitali 4.

*Ralajangersakkat assigiinngitsut.*

**§ 17.** Qinersinermut ataatsimiititaliap allattoqarfiata qinersinermi atortussat suliarinissaat nassiunnissaallu pisortaaffigaa.

**§ 18.** Qinersinermut ataatsimititaliap qinersinerup piareersarneqarnerani ingerlanneqarneranilu piginnaatinneqarpoq nalunaarummi aalajangersarneqarsimasunik allanngortitsisarnissamut, taamaaliornissaq pissutsit, ilaatigut silap qanoq innera, pissutigalugit pisariaqarsorinaraangat, tamatumani qinersinerup isertuussaanera ingerlanneqarneratalu tamakkiisumik nakkutigineqarnera qułakkeersimajuarneqarsinnaappata.

**§ 19.** Nalunaarut atortuulerpoq ulloq 17. februar 1995. Ulloq taanna atorunnaassaaq Kalaallit Nunaanni vicebiskoppissamik qinersisarneq pillugu Namminersor-nerullutik Oqartussat nalunaarutaat nr. 1 27. januar 1984-imeersoq.

*Namminersornerullutik Oqartussat, ulloq 16. februar 1995.*

Marianne Jensen

Ej vind Christoffersen

**Namminersorlutik Oqartussat**  
Imaneq 4  
3900 Nuuk  
E-mail: nsninatsit@nanoq.gl

Linkit iluaquataasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut